



Nezadovoljstvo novim Programom mjera za pomoć privrednim subjektima u Brčko distriktu BiH

Brčko, 11.12.2020 - Privredna komora Brčko distrikta BiH izražava svoje nezadovoljstvo novim Programom mjera za pomoć privrednim subjektima u Brčko distriktu BiH, koji je donijela Vlada Brčko distrika BiH na svojoj 129. vanrednoj sjednici, kao i Vladinim mjerama pomoći koje su ranije donosene. Ujedno, naglašavaju i svoju zabrinutost trenutnim stanjem i posljedicama koje je na privredu Brčko distrikta BiH ostavila pandemija COVID-19.

Iz Privredne komore poručuju da Program mjera za pomoć privrednim subjektima ne predstavlja sistemski pristup u rješavanju problema sa kojima se susreću privrednici Brčko distrikta BiH, uzimajući u obzir činjenicu da Programom nisu obuhvaćeni svi ključni subjekti koji su pogođeni situacijom na tržištu.

Djelovanje Vlade je materijalizovano samo sa ciljem očuvanja radnih mjesta u djelatnostima direktno pogođenim posljedicama pandemije koje su uzrokovale nemogućnost obavljanja privredne djelatnosti, što Privredna komora smatra dobrim, ali nedovoljnim potezom za očuvanje stabilnosti privrednog poslovanja u Brčko distriktu. Program mjera pomoći Vlade izostavlja konkretnu podršku nosiocima privrednog sektora, koja bi učinila održivim poslovanje i ukupan realni sektor.

Samo sistemski pristup uzroku problema može pružiti održivo rješenje usmjereno u epicentar problema, čiji bi konačni rezultat bio i očuvanje radnih mjesta, poručuju iz brčanske Komore. Za ovakav oblik podrške nije dovoljno samo izdvojiti simboličan iznos budžetskih sredstava, već djelovanje mora obuhvatati niz uzajamo povezanih mjera, počevši od unapređenja postupaka ostvarivanja podsticaja, poreskih olakšica, povećavanje iznosa usmjerenih ka privrednicima kroz postojeće programe, kao i blagovremeno usvajanje budžeta, sa ciljem generisanja održivog privrednog poslovanja u predstojećem periodu.

Privredna komora Brčko distrikta BiH će u budućem periodu, nakon formiranja novog sastava Vlade Brčko distrikta BiH tražiti mnogo veću i obimniju pomoć u ublažavanju posljedica koje je pandemija COVID-19 ostavila na privredu Brčko distrikta BiH, kako bi zajedničkim djelovanjem usmjereno djelovali sa ciljem očuvanja ugrožene privredne djelatnosti u Brčko distriktu.

Više informacija:

Privredna komora Brčko distrikta BiH, tel. 049 216 116